



MATTEU PIRINA CUCCHEDDHU

1

Chistu è lu tistamèntu
Chi lass'a la familia Cuccheddhu:
Iddhu ni vó pientu
E né signali di luttu niédhdhu.
Cuccheddhu vó custanti
D'incumandall'a Deu e a li Santi.

2

Casandra, la mé' méla,
La dì chi da lu mundu mi nni spóddhu,
Un abbitu di téla
Pa' ultimu 'istiri è lu chi vóddhu;
Cu' li calzi e isculzu
E in capu un cappédhdhu di pilunzu.

3

Lu lussu e lu 'alóri
Ch'è pa' ca' lu 'ntarra pena e dólu,
No lu 'ó lu Signóri
Chi a iddhu lu 'ntarrésini in linzólu.
Pa' noi cant'è néu
A vulé prisumì più di Deu!

4

Èu Casandra bona,
Lu chi ti précu di punimm'in manu
Di lignu una curona
Ch'è lu signali d'esse cristianu;
E un baùlu fini
Chi sia cunsumatu a li tre dini.

5

Si l'agghju, dui 'acchi,
L'ammazzéti, si séti in faurimmi:
Cunsuléti li stracchi
Ch'onori s'an'a fa pa' sippillimmi;
uniti a li chi restani
ch'a fa l'alti silvizi si prestani.

6

Tutti li bon passòni,
Li chi séti capazzi e di curagghju,
vi précu d'uniòni
d'accompagnamm'a l'ultimu 'iagghju;
Tantu è una dì sólu
Chi pal sempri lu cuccu piddha bólu.

7

Catru scudi a lu preti,
Di più no possu chi débili sòcu;
Piddharà lu chi deti,
Vi ll'à a pacà Déu siddh'è pocu:
È un preti d'onóri,
si pó accunultà di lu bon córi.

8

Dapoi, in campusantu,
Mi pultarét'in casa multuaria;
Li chi m'arét'innantu,
Déu da dugna mali vi ripària
E vi pachia 'n céli
Déu, cu' li só' ópari fidéli.

9

In calche azza di muru,
Si v' à disoccupati, in calche sittu,
No llu docu a siguru,
Ma fòssi pongaragghju calche scrittu
Pa' raccontà calcosa
Undi pa' sempri lu Cuccu riposa.

10

Ciòani in pilu brundu,
Li ch' aéti in córi di silvìmmi bè
Féti un fòssu pruffundu
Chi vi nni stia un altu supr' a me
Pa' no più vidé
Una minima sticia d' ossi méi.

11

Poi cun bon mimória,
Vi dispiditi da undi soc(u)' éu,
Prichèndi chi illa gloria
Ci tolghimi a vidé addananz' a Déu
Éu Tocca a istà chini,
Aspittendi di 'óì dugna dìni.

12

Dapói l' accunòltu,
pultéti in casa da chi sét' auniti,
parò mi féti un tòltu
Li chi di 'éru córi mi pigniti
Ch' è tuttu lu cuntrariu:
Pa' lu mòltu lu ghjustu è lu rusariu.

13

Vóddhu chi m' accumpàgniti
Pigniti pocu ch' è óra palduta;
Vóddhu poi chi màgniti
Cu' la ghjenti benigna ch' è vinuta,
Chi siddhu no magnéti
Pal me è un dispettu chi mi féti.

14

Magnéti tutt' in paci
Com' unu ' nvìtu di tranquillitài,
Chi Déu si nni piaci
S' osselvéti la só' umanitài,
E diti cun córi esattu
A Déu: - Binidittu lu ch' è fattu! -

15

Attu di ' ulémmi bè,
D' ammintavvinn' in calche dì sulenna,
Bastaria pal me
Un Babbu Nostru, una requiem eterna
E dà, cun córi drittu,
Calche limusinédhha a calche afflitu.

16

V' agghju dittu di celtu
Chi lagrimi a lu céli no vi nn' anda:
Mé' fiddhóli v' avveltu
Di mai maltrattà la mé' Casandra,
Chi si mi féti chistu
Tristi di 'óì lu ch' agghju prummissu!

17

Chist' algumentu spòngu,
Ma lu déti piddhà lu ' mpòstu méu:
Mé' fiddhóli v' impongu
Chi in tutti li cosi, ' uniti a Déu,
voi tènghiti presènti
Cant' Iddhu dici illi Cumandamènti.

18

Presènti lu mé' impòstu
Voi déti tiné cantu campéti:
A lu poppulu nostru
No féti mai lu chi no vuléti;
D' esse cun córi esattu;
Tuttu lu chi vuléti sia fattu.

19

Agattu di 'mpunivvi
Chi davvi unu 'mpòstu mi piaci;
L'altu chi agghju di divvi
È chi àgghjiti cuncòldia e la paci.
E lu bè chi vi lassu
Vóddhu chi vi llu paltiti a discussu.

20

Si nasci chistiòni
Vi doarét'arrangià cu' amicizia:
Cilchéti la rasgiòni
E no cilchéti mai la ghjustizia
Chi no è mai ghjusta
Ch'è da sécculi agabbata e frusta.

21

Via ghjusta piddhéti
E no parét'aricchji a nisciun bréa;
Si mèddhu no pudéti
Ammintéti di fà la 'ita méa:
Magnéti si nn'aéti
E a fidi di Déu trabaddhéti.

22

No tucchéti l'angènu,
No déti offindì mancu una musca:
Tutt'è fócu e vilènu,
Chi l'angènu si nn'anda tuttu in crusca.
Lu pani ch'à saóri
È lu chi si trabaddha cun sudóri.

23

Onóri, si nn'aéti,
Tinitivillu contu cu' afficcu;
Si onorati séti
L'òmu ch'è onoratu è ancóra riccu;
Chi l'onóri à un donu:
à di l'óru la tinnita e lu sònu.

24

No vi donu trisòri,
Ma sólu vóddhu davvi un'avviltènzia:
No féti li signòri,
Trabaddhéti cun córi e cun cuscènzia:
L'òmu chi no trabaddha
Folma un muntòni d'óziu e di paddha.

25

Ca' trabaddha d'aspettu,
Chi Déu li fatichi vi lli paca,
Sèmpri di córi nèttu,
Dugna 'iziu malu si llu laca;
Si laca ghjunghja cosa
Torr'a casa la séra e si riposa.

26

Cos'è chi décu divvi
Ch'abà mi socu allungatu abbastanza
Ma torru a ripittivvi cun custanza
D'amà a Déu e li diòtti Santi
E prichéti agghjutoriu
Pa' l'àmini chi sò in pulgatóriu.

27

Provisóriu mundu,
Cantu sé' mumintania la 'ita!
Pinsèndi mi cunfundu
Pa' l'eterna e tremenda dispidita;
Vita chi com'un ventu
Bóli e ti lassu lu lócu niéddhu.

Chistu è lu tistamèntu

Chi lassa a la famiglia Cucchéddhu

Progèttu:

“ÉU FAÉDDHU GADDHURÉSU”

Finanziàtu da la Legghji 482 di lu 1999, alticculi 9 e 15 e Legghji Regionali 22 di lu 2018 – annualitài 2021